

Meeqqanut tapiissutit pillugit Namminersorlutik Oqartussat nalunaarutaat

Meeqqanut tapiissutit pillugit Inatsisartut inatsisaanni nr. 9, 7. december 2009-meersumi § 4, imm. 3, § 6, imm. 5 aamma § 10, imm. 2 naapertorlugit aalajangersarneqarpoq:

Kapitali 1

Isertitassatut naatsorsuutigisat naatsorsorneqartarnerat

§ 1. Isertitassatut naatsorsuutigisat ukiumut tapiissuteqarfiusussamut ataatsimut imaluunniit ukiup tapiissuteqarfiusussap ilaata sinneranut naatsorsorneqassapput. Inuup inuilluunniit isertitaat meeqqanut tapiissutiniq tunniussinissamut tunngaviusut malillugit isertitassatut naatsorsuutigisaasut tamarmik naatsorsuinermit ilanngunneqartassapput.

§ 2. Ukiumi tapiissuteqarfiusumi imaluunniit ukiup tapiissuteqarfiusup ilaata sinnerani aningaasarsiassatut A-tut naatsorsuutigisat naatsorsorneqarneranni, aningaasarsiat A-t tamarmiusut ukioq naallugu isertitanngortinneqarnerat aallaavigalugu naatsorsorneqassapput.

Imm. 2. Ukiumi tapiissuteqarfiusumi imaluunniit ukiup tapiissuteqarfiusup ilaata sinnerani aningaasarsiassatut B-tut naatsorsuutigisat naatsorsorneqarneranni, ukiumi isertitanik naatsorsuiffiusumi kingullermi aningaasarsiat B-t tunngavigineqassapput, taamaassanngilarli inuup B-nik aningaasarsiaqarsimasup uppersarsarsinnaappagu, nammineerluni inuussutissarsiutigisap atorunnaarsimasup, annikillingaatsiarsimasup imaluunniit allatut allanngortinneqarsimasup nassataanik aningaasarsiaasut. Allanngortoqarsimanera pissutigalugu ukiumi isertitanik naatsorsuiffiusumi kingullermi aningaasarsiat B-t atorineqarsinnaanngippata, aningaasarsiat B-t akileraarusigassaanngitsut sinnerlugit B-tut aningaasarsiaasimasut tamaasa aallaavigalugit isertitat naatsorsorneqassapput. Naatsorsukkat ukioq naallugu isertitanngortillugit aqqinneqassapput.

Imm. 3. Isertitassatut naatsorsuutigisani inummut ilanngaata ilanngaaticigineqarpat, isertitassat akileraaruserneqartussaasut meeqqanut tapiissutiniq tunniussinissamut tunngaviusut takuneqarsinnaanngussapput.

Imm. 4. Ilanngaaticit tassaasinnaapput inummut ilanngaata imaluunniit akileraaruteqaataasussanit ilanngaata. Ilanngaata iluanaarutaanerpaasusaaq toqqarneqassaaq.

Kapitali 2

Isertitat annertuumik ataavartumillu allannguuteqarnissaat naatsorsuutigineqarpat meeqqanut tapiissutiniq tunniussinissaaq

§ 3. Isertitat akileraaruserneqartussat pissutsit allanngornerannik pissuteqartumik ukiup ingerlanerani annertuumik ataavartumillu allannguuteqarpata, allannguutitut naapertuuttumik meeqqanut tapiissutit

naleqqussarneqassapput.

Imm. 2. Meeqqanut tapiissutit annertussusissaat atuuttoq naapertorlugu allannguut tapiissutit allanngornerannik kinguneqarpat, isertitat akileraaruserneqartussat annertuumik allanngussapput.

Imm. 3. Isertitat akileraaruserneqartussat ataavartumik allanngorsimassapput, isertitat tamakkiisumik ilaannakortumilluunniit meeqqanut tapiissutinik tunniussinissamut tunngaviusut ilaatinneqarunnaarpata, assersuutigalugu toqukkut qimagunneq, soraarnerussutisiaqalerneq, averuserneq, avinneq aappariikkunnaarnerluunniit pissutigalugit. Pissutsit sivikitsumik allannguuteqatsiarnerisa kingunerannik isertitat allannguuteqarnerat ataavartumik allannguutitut isigineqanngillat, tassa meeqqanut tapiissutinik allannguinnissamut pisinnaatitsisumik. Pissutsit sivikitsumik allannguuteqatsiarnerat imatut paasineqassaaq, piffissaq qaammatit pingasut missaannik sivissussuseqartoq taakkuninngaluunniit sivikinnerusoq.

Imm. 4. Pissutsit allanngorneri pillugit paasissutissat kommunimit pissarsiarineqareernerisa kingorna meeqqanut tapiissutit qaammatip aallaqqaataanit atuuttussanngorlugit naatsorsoqqinneqassapput. *Imm. 1* naapertorlugu allannguutit pillugit paasissutissat meeqqanut tapiissutinik qaffaanermik nassataqartussat, allannguuteqarnermit kingusinnerusumik kommunimit pissarsiarineqarpata, meeqqanut tapiissutit allanngortoqarneranit atuuttussanngorlugit naatsorsorneqassapput, kukkuneq tapiissutisisinnaatitaasup nammineerluni kukkuneranik tunngaveqanngippat.

Kapitali 3

Meeqqanut tapiissutit tunniunneqartarnerat, tassunga ilanngullugu ukiukinnerusunut tapiissutinik tunniussisarneq tapiissutinillu aqutsineq pillugit maleruaqqusat

§ 4. Meeqqanut tapiissutit qanoq tunniunneqartarnissaat kommunip aalajangertassavaa, piumasarisinnaallugulu tapiissutinik tigussisussap aningaaserivimmi assigisaaniluunniit tapiissutit ilineqarfisinnaasaannik kontomik nalunaaruteqartoqarnissaa.

§ 5. Angajoqqaat najugaqatigiippata, meeqqamut tapiissutit angajoqqaat katillutik isertitaat akileraaruteqaataasussat aallaavigalugit tunniunneqassapput. Tamanna atuuppoq angajoqqaat katissimappata inooqatigiippatalu, taamaattoqassappallu piumasaqaataanngilaq inooqatigiinneq sivikinnerpaamik ukiumik ataatsimik sivissussuseqassasoq, tassa inatsisit malillugit angajoqqaat marluullutik meeqqamut pilersuisussaammata.

Imm. 2. Meeraq angajoqqaami arlaanni najugaqarpat, taassuma isertitai akileraaruteqaataasussat aallaavigalugit meeqqanut tapiissutit tunniunneqassapput. Angajoqqaap taassuma meeqqap angajoqqaarinngisaa alla katissimappagu, katissimasaata isertitai akileraaruteqaataasussat ilanngunneqassapput. Angajoqqaq taanna meeqqap angajoqqaarinngisaanik allamik inooqateqarpat, inooqatigisaata isertitai akileraaruteqaataasussat ilanngunneqassapput, inooqatigiinneq sivikinnerpaamik ukiumik ataatsimik atuussimappat.

§ 6. Meeqqanut tapiissutinik tunniussinermi tapiissutinik tigussisoq ilisimatinneqassaaq, meeqqanut tapiissutinik tunniussinissamut piumasaqaatit pillugit aamma naatsorsuinermit tunngaviusussat pillugit. Aamma tapiissutinik tigussisoq ilisimatinneqassaaq, pissutsit allanngornerini paasissutissiisussaataaneq pillugu, meeqqanut tapiissutinik tunniussisaannarnissamut pingaaruteqarmat.

Imm. 2. Kommunimut allamut nuunnermi, kommuni nuuffigineqartoq paasissutissanik tapiissutit annertussusissaannik naatsorsuinissamut pisariaqartinneqartunik pissarsiniassalluni pisussaavoq.

Kommunip nuuffigineqartup paasissutissat suliamut attuumassuteqartut inunnik nalunaarsuiffimmut akileraartarnermillu ingerlatsivimmut pissarsiariniassavai. Paasissutissat amigaateqarpata paasissutissanik allanik pissarsiniartoqassaaq.

Imm. 3. Meeqqanik tapiissutinik tiguisartup pisussaaffigivaa, pissutsit tamaasa meeqqanut tapiissutit annertussusissaannik naatsorsuisarnermut pingaaruteqartut kommunimut paasissutissiissutigissallugit.

Imm. 4. Uppernarsaatit paasissutissallu meeqqanut tapiissutit ukiumoortumik aalajangersarneqartarnerannut imaluunniit naatsorsoqqinneqartarnerannut pingaarutillit, taakkununga ilanngullugit, maannakkut isertitat annertussusaat, ilanngaatisatut naatsorsuutigisat annertussusaat imaluunniit isertitat ilaasa atorunnaarsinnaanerat pillugit uppernarsaatit kommunip ilaatigut qarasaasiatigut piumasarisinnaavai.

§ 7. Inatsisip § 5-iani maleruaqqusat naapertorlugit meeqqanut tapiissutit meeqqamut iluaqutaanngitsut uppernarsarneqarpat, kommunip aalajangersinnaavaa, meeqqanut tapiissutit aqussallugit imaluunniit tapiissutit tamakkiisumik ilaannakortumilluunniit inuussutissanngoreerlugit tunniunneqartassasut. Tunniussinerit nioqqutissanik pisissutissanngorlugit (rekvisition) pisassapput. Aningaasat amerlanngitsut, immaqa naafferartumik, tapiissutinik tiguisinnaatitaasumut aningaasanngorlugit tunniunneqartarsinnaapput.

Imm. 2. Kommunip aalajangerpagu, meeqqanut tapiissutit tamakkiisumik ilaannakortumilluunniit meeqqamut efterskolemi, skolehjemmemi assigisaanniluunniit najugaqartumut tunniunneqassasut, meeqqap pilersorneqarnissaanut aningaasartuutit sorliit tapiissutitigut matussuserneqarnissaat pillugu ataatsimoortumik takussutissaliortoqarsinnaavoq.

Imm. 3. Aningaasartuutissanut takussutissat imm. 2-mi taaneqartut sapinngisaq tamakkerlugu meeqqanut tapiissutinik tiguisinnaatitaasoq suleqatigalugu suliarineqassapput.

Kapitali 4

Nakkutiginninneq

§ 8. Kommunip ilimagilluinnarpagu meeqqanut tapiissutinik tiguisussap piumasaqaatit naammassisinnaanngikkai, taava kommunip pineqartoq qinnuigissavaa, suliaasat piviusut kommunip isumaanik allanngortitsisinnaasut uppernarsassagai.

§ 9. Paasissutissanik kommunip meeqqanut tapiissutinik naatsorsuineri atugassaanik piaaraluni nipangiussineri, eqqunngitsumik paatsiveerutsitsisinnaasumilluunniit paasissutissiineri imaluunniit allatut piaaraluni paasissutissanik tunniussinnginneri politiinut unnerluutiginnittoqassanersoq pillugu kommune naliliisinnaavoq.

Kapitali 5

Atortuulersitsineq

§ 10. Nalunaarut manna 1. november 2012 atortuulersinneqarpoq.

Imm. 2. Peqatigitillugu Meeqqanut tapiissutit pillugit Namminersornerullutik Oqartussat nalunaarutaat nr. 38, 19. december 1996-imeersoq atorunnaarsinneqarpoq.

Mimi Karlsen

/

Lise Lennert Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut